

文山集

文山集

宋丞相文山先生全集卷之十五



宋少保右丞相兼樞密使信國公文山先生紀年錄

正文乃公獄中手書附歸全文集註雜取宋禮部侍郎鄧光薦中甫所撰丞相傳附傳海上錄宋太史氏管發國寶至元間經進甲戌乙亥丙子丁丑史平慶安刊行伯顏丞相平宋錄參之公所前後錄集杜句計前後卷旁采先友遺老話舊事蹟列疏各年之下

丙申 宋理宗端平三年

予以五月二日子時生大父夢予騰紫雲而上命名雲

文山全集 卷之五
孫既長朋友字曰天祥後以字貢于鄉字之者改曰履
善理宗覽對策見其名曰此天之祥乃宋之瑞也朋友
遂又字之曰宋瑞而通稱之

廬陵文氏來自成都公六世祖炳然居永鎮五世
祖正中徙富田曾祖安世贈太保邢國公大父時用
贈太傅永國公父儀字士表人稱爲革齋先生贈太
師惠國公母曾氏齊魏國夫人

丁酉

宋理宗嘉熙元年

庚子

嘉熙四年

辛丑

宋理宗淳祐元年

壬子

淳祐十二年

癸丑

宋理宗寶祐元年

甲寅

寶祐二年

是歲公夢召至帝所帝震怒責其不孝公哀訴以臣
實孝帝曰人言卿不孝卿言卿孝賜以金錢四遣去
公出門而震雷欲擊之自嘆曰幸免不孝之罪而又
不免雷擊驚覺汗如雨後一舉登第而有父喪但未
解四金錢爲何義

乙卯

寶祐三年

是歲大比以字舉郡貢士弟璧同舉冬俱赴省侍父革
齋先生行予既以字爲名字之者改曰履善提舉知郡
李廸舉送

革齋先生與弟書曰道出玉山遇異僧指長男曰此
郎必爲一代之偉人然非一家之福也

丙辰

寶祐四年

二月朔禮部開榜中正奏名弟壁同登及大庭試策有
司寘予第五理宗皇帝覽予對親擢爲第一臨軒唱名
盖五月二十四日也時革齋先生卧病客邸予自期集
所請朝假侍湯藥二十八日革齋先生棄世天府治喪
榜下士資送道路費粗給兄弟即日扶護還里以君子
不家於喪沿途餽送並不受

丁巳

寶祐五年

九月葬革齋先生

戊午

寶祐六年

八月從吉時丞相丁大全用事或勸通書者予曰仕如是其汲汲耶郡侯欲爲言于朝除初官力辭謝得止

己未

宋理宗開慶元年

五月臨軒策士旨差簽書寧海軍節度判官廳公事朝廷檢會照格授承事郎予聞命辭免乞行進士門謝禮旨令朝謝訖之任九月入京時江上有變吳丞相潛再相初入都知董宋臣主遷幸議京師洶洶予門謝訖即上疏乞斬董宋臣以一人心以安社稷建明倣方鎮建

守就團結抽兵破資格用人數事書奏不報還里

舊例三魁唱名罷賜袍笏謝恩入幕賜御饌進謝恩詩出賜席帽於闕門上馬迎入期集所又名中元局官給錢物供張皂隸等於此聚同年待賓客刊題名小錄賜聞喜宴進謝宴詩如此者一月然後率榜下士詣闕謝恩謂之叩謝門謝後授初階內狀元授承事郎簽書某軍節度判官廳公事至後一科放進士榜則前一科狀元召入爲秘書省正字名曰對花召

庚申 宋理宗景定元年

二月差簽書鎮南軍節度判官廳公事辭免乞祠祿旨
差主管建昌軍仙都觀

辛酉

景定二年

十月除秘書省正字時賈丞相似道當國年餘頗訝不

通名及除入館得予書舉張師德兩及吾門故事始重
嘉歎

誥詞曰倫魁登瀛故事也然始進大率以虛名既久乃
知其實踐爾則異於是初以遠士奉董生之對繼以卑
官上梅福之書天下誦其言高其風知爾素志不在溫
飽麟臺之召其來何遲語有云居大名難又云保晚節
難爾其厚養而審發之使輿論翕然曰朕所親擢敢言
之士可 劉克莊行

壬戌

景定三年

四月供正字職尋兼景獻府教授五月充殿試考官進

校書郎誥詞曰新進士唱第前舉首必召故事也爾以
陟岵之故稽登瀛之擢一旦來歸如麟獲泰時鳳集阿
閣甫繡黃本俄映青藜在他人爲速在爾爲晚矣人之
不可及者年也不磨者名也至哉天下樂者書也朕將
老汝之才而極其用焉耳

癸亥

景定四年

正月除著作佐郎二月兼權刑部郎官刑部事最繁重
居官者率受成於吏號清流者尤所不屑爲予鈞考裁
決晝夜精力不倦吏不能欺懾服焉八月以董宋臣覆
出爲都知上䟽論其惡不報束擔將出闕丞相遣人謂

公不可差知瑞州十一月赴郡十二月迎親就養郡兵
火後瘡痍乍復予撫以寬惠鎮以廉靜郡兵素驕取其
桀黠寘之法張布綱紀上下肅然於交承外積緡錢萬
創便民庫去之日填兵出前窠名爲楮百萬有奇遺愛
在民久益不忘

甲子

景定五年

十月召赴行在尋除禮部郎官十一月除江西提刑辭
免不允

乙丑 宋度宗咸淳元年

二月就瑞州交割提刑職事時大赦後推廣德意全宥

文山全集 卷之五
居多惟平寇扶楮稍振風采四月行部至吉州太和縣
伯祖母梁夫人歿予父所生母也申解官承心制閭臺
臣黃萬石以不職論罷是歲闢文山

臨江城中金地坊銀匠陳見負關會過于市者歎曰
我等困苦止欠此馱耳翼早盜殺負關會人慧力寺
後山中捕司跡盜急市荷擔行鬻餽餌者以所聞陳
語告捕司鞠陳筆楚誣服將受刑辭其母曰爲子不
能終養必宿冤債無可說者望吾母焚紙錢於吾死
處告土神乞指引我到盜殺人處又焚紙錢於盜殺
人處告土神乞指引我到殺人正賊之家母如其言

後月餘母夢子告曰謝母已得正賊乃有術後李某家所得關會具在暗閣上竹籠內於吾死後止用訖關會買牲酒賽謝神福內覆紙單籠上用草爲遮蓋塵灰積滿一二日文挺刑到請母爲陳訴越數日公到陳母乞屏左右持素紙以所夢訴公即命有司同陳母請李閣悉如夢遂以李償負關會人死推司及元捕人償陳死官瞻養陳母終身此趙君厚言也

丙寅

咸淳二年

丙寅戊戌庚戌丙子長男道生生

丁卯

咸淳三年

丁卯壬寅甲午丙寅次男佛生生二月女柳生三月女
環生九月除尚左郎官辭免不允十二月赴闕供職誥
詞曰蘇軾有云仁宗皇帝在位最久得人最盛進士高
科類至顯位我理宗享國庶幾仁祖取士之數却又夥
焉當時褻然之選今其存者無不登進獨爾以陳情之
表讀禮之文淹恤在外尚遲擢用夫風之積不厚則其
負大翼無力若爾之植立不凡非特以高科也而又益
培厥栽則其滋長也孰禦尚左高於郎位其以是起家
方天之休敬之哉可

馮夢得行

戊辰

咸淳四年

正月無學士院權直無國史院編修官實錄院檢討官
是月臺臣黃鏞奏免所居官冬至除福建提刑臺臣陳
懋欽奏寢新命

己巳

咸淳五年

四月差知寧國府辭免不允十一月領府事府極彫弊
始至爬梳條理曠然無事寧國爲郡居上流斗絕稅務
無所取辦則椎剥爲民害予奏罷之別取郡計以禱課
額百姓歡舞去後爭醵錢立祠

先是乙卯春公家趨城三十里曰冷水坑旅店胡翁
夜夢門外巨石有龍蛻爪其上夢甚著覺而異之昧

爽即擁帚掃除石驢所夢已而公至則坐于石更履
翁言早寒願飯而去詞意甚勤公問故以夢告且曰
他日必富貴願垂憐我家公諾焉由是公家入往還
經從必飯其家歲時翁嫗至公家必優贈與至是公
載家寧國弭任歸午飯胡店胡以宿諾請公笑曰諸
擔中任擇取其一胡屢謝不敢則擇取一擔以告公
令衆啓擔視之則扇也公曰此遠方土宜爲鄉里親
友餽者汝無用焉命衆估時值以其直與之蓋胡以
公五馬貴如他人皆輜重充溢不知公行橐固枵然
是以任其自擇無嫌也公之子孫過之胡之子孫仍

奔走迎送不倦公家亦時優恤之一夢之吉乃纏綿
受實惠異哉此胡老之言也

庚午

咸淳六年

正月朔除軍器監兼右司辭免不允四月供監職免兼
右司尋兼崇政殿說書兼學士院權直兼玉牒所檢討
官會平章賈似道託疾歸紹興乞致仕旨令學士院降
詔不允賈有要君之志予當制裁之以正義時內制相
承皆呈藁當國改竄惟命重失王言之體予直道而行
遂忤賈意七月除秘書少監兼職依舊臺臣張志立奏
免所居官